

## Cronica da disgrazias dil 19avel

### 1806

Ils 19 da fevrer 1806, mesjamna dalla tschendra, ei la lavina vegnida giu dalla **Val da Plaun** (sur **Selva**) entuorn l'ina dil di ed ei ida cun ina casa dubla gronda, nua che la glieud eran per ventira fugi ual avon pign mument. Era in clavau dador baselgia cun enzacons tiers manedels ei vegnius sfraccaus ensemes; cun ils tiers gronds fuvan ins untgi ora il di **avon**.

### 1808

Ils 12 sils 13 da december 1808 destruescha ina lavina la gronda part dil vitg da **Selva**; 42 persunas ein vegnidas satradas e 25 han anflau la mort, 17 dels perencunter ein vegni spindrai.

### 1808

Zu eben dieser Zeit [Dezember 1808] riß sich eine Lauine unter dem Berg **Quolm de Vi ob Salins** im **Tavetscherthal** los und überstürzte in **Valtgerva (Valtgeva)** 7 mit Futter angefüllte Viehställe, wo nie Lauinen zu begegnen pflegten. Unweit dieser Gegend brachen zwey andere Schneelauinen los: die einte riß in **Sedrun**, im Hauptorte **Tavetsch's**, ein Haus ein, und die andere deckte einen Stall und eine Schmidte [Schmiede] zu. Auch diese Lauine war unerhört.

*Ms. Placi Spescha 8.*

### 1809

Il schaner ein dus umens vegni satrai dalla lavina dador il vitg da **Selva**.

### Disgrazias senza datums precis

In cert Rest Riedi ei vegnius per la veta dador **Selva** entras in crap ruclont (1834). - In Balzer Riedi ei daventaus l'unfrenda d'in squatsch lavina ed ha anflau la mort ella **Bullatscha**. - In Schnoz cun aunc in auter ein vegni ella lavina dadens **Carmihut**. Lur baras han ins anflau per la primavera. - Il Barclamiu Berther ei ruclaus ellas **Vals** cun encuir ses tiers, in Curschellas dad ir per cristallas.

### 1810

Daniev 1810. La lavina dils **Tschenghels da Rusas** e quella dalla **Val Ruinatsch** destrueschan ina casa a **Selva**. Pader Placi a Spescha rapporta: «*Igl onn 1809, ils 31 da december, ei stau ina notg ed in di da tema e da horrur per Selva. La cufla ha entschiet la sera avon da haregiar, cuflau tutta notg ed entuorn las tschun dalla damaun vegn la lavina da Tschenghels da Rusas e rumpa en la casa entadem il vitg, la preit sisum da quella dil maun dadens ed igl esch dado da tschaler ed emplenesch en cun neiv. Sut casa ein dus clavaus fretgi en, rut portas e lenna ed empleniu en cun neiv, ed il tierz fretgs encunter cun neiv. Sur la casa dalla pervenda ora ei ida la lavina tgulond e saccudend la casa. Suenter messa gronda, allas dudisch, duront ch'ils umens da Tschamut eran en casa pervenda per prender resti dil beneficiat dad ir a Tschamut, vegn la lavina dil Ruinatsch, siglent'en las finiastras dalla casa ora giudem dil vitg sut il clavau dalla pervenda e dadens dus eschs nuegl. Tschella lavinabett'en ina talina e questa in chischner e spuorla sin las finiastras dalla casa dalla pervenda bien e ferm e stgira la stiva.*» - Quella notizia sesanfla egl urbari da **Selva** ed ei suttascrettia: «Pader Placi, viu cun mes agens egl. Hai secre e sun serendius a Tschamut aunc quei medem di.»

### 1811

Ils 25 d'avrel, returnond Maria Barla Monn en da **Mustér**, eis ella dada sur in piogn giu el **Rein**. Perveseders han anflau ella l'auter di o l'**Acla** e tratg ella ord l'aua.

### 1812

Ils 7 da settember ei Giusep Antoni Giossi ruclaus da far fein a pastg sillia **Plaunca Droz da Rots, Val Bugnei** e vulend alzar si eis el morts.

## **1816**

Ils 24 da settember ei Vigell Liberat Monn serendius da notg ord tegia dil **Cuolm da Vi e curdaus** sur in precipezi giu el **Drun da Bugnei** e staus morts.

## **1816**

Igl onn senza stad.

## **1817**

Onn dalla fom cun gronda miseria.

## **1817**

Epidemia a **Selva**, bia morts en consequenza digl onn 1816, quel senza sulegl ed igl onn 1817, igl onn dalla fom.

## **1817**

Ils 6 da mars, la sera allas 8, ei la secunda gronda lavina da **Rueras** veginida a val. En quella han 28 persunas anflau la mort, 19 outras han ins pudiu spindrar. L'emprema gronda lavina datescha digl onn 1749 cun varga 60 unfrendas.

## **1817**

Ils 28 da mars han ins anflau Vigeli Giusep Riedi, returnaus dad **Ursera**, schelaus sil **Cuolm d'Ursera**.

## **1821**

Ils 12 da settember ei Vigeli Giusep de Florin veginius per la veta cun far fein a pastg el **Baun Tschinglatsch**.

## **1822**

Per il di da sogn Placi, ils 11 da fenadur, ei igl entir vitg da **Camischolas** barschaus giu. Duas persunas ein daventadas las unfrendas dallas flommas: Onna Maria de Pally e Maria Liberata Rothmund, ina mattatscha da 7 onns.

## **1822,**

den 11. des Heumonats (*fenadur*) als die meisten Einwohner bei der Feier in **Disentis** und die andern in den Alpen waren und im Ort nur drei Männer, ein Mann, der Pfarrer und Kaplan, brannte das Dorf **Camischolas** im **Tawätscher-Tal** ab. Es bestand aus 15 Häusern, und ungefähr ebensoviel (16) Heuscheunen, in allem 31 / 29 Gebäude, und die mit Heu angefüllt waren. Die schöne Kapelle St. Anna ging zugleich im Rauch auf, und von ihre konnte das gerettet werden, was die Anstrengungen des Herrn Pfarrers Joseph Hiz, und des Herrn Kaplans in **Rueras** Vigili Venzin vermochten. Man bedauert dabei bei fünf schön von Holz gebauten Häuser, die mit Nageldach versehen waren. – Dieses ist allenhalben ein Feuer- und Hageljahr.  
*P. Placi a Spescha, scartira nr. 178 – 180*

## **1829**

Ils 23 d'uost ei il nurser Rest Valentin Beer da **Camischolas** daus sur in precipezi giu sill'a "Puzza", els **Neidis**, e staus morts.

## **1833**

Ils 6 da mars ei Gion Rest Monn da 17 onns veginius en in squatsch lavina ella **Val da Claus** e restaus morts.

## **1834**

Ils 22 da zercladur ei il mattatsch da 15 onns, Rest Giusep Riedi, daus en in vadretg ellas **Vals** e veginius anflaus morts suenter 4 dis buca dalunsch dil liug dalla disgrazia.

### 1836

Vigelgia da Nadal. Suentermiezdi, circa allas quater, ein statalter Giachen Antoni Monn da **Zarcuns** e Sep Lurenz Schmed da **Rueras** vegni ella lavina a **Giuv**, ferton ch'els pervesevan. L'auter di ein els vegni cavai ora morts. Aunc quater auters perveseders ein vegni quei di ella lavina, ein denton mitschai cun la veta.

"Ei vegn detg ch'en **Tujetsch** a **Sogn Giachen** hagi la lavina priu dus giuvens. Ei fuss d'augurar che quella nova seconfirmass buca."

*Il Grischun Romontsch 1837, nr. 45, dils 3-1. Probabei ils sura dus.*

### 1843

Ils 23 da matg ei Giusep Martin Peder da **Rueras** vegnius per la veta en in squatsch lavina en la **Val Giuv** sut il **Draus** cun far nitschuns. El veva 53 onns.

### 1850

Direcziun da polizia cantunala attesta entras scriver dils 26 da zercladur 1850 l'anflada d'in skelet d'in um anflaus si l'**Alp Tschamut**. Document egl Archiv da cumin nr. 1075, 26 da zercladur 1850.

### 1850

Barschament d'ina casa la notg dils 12 da mars 1850 a Sedrun. Ils pertuccai ein stai: Toni Macolin, Vigilius Mucli, nagler, Elisabeth Mucli, Joseph Maria Mucli e Rest Antoni Mucli. Il donn ei vegnius schazegiaus sin 2045.38 fras. La collecta dil cumin dalla **Cadi** ha purtau 221.52 frs.

### 1850

Destrucriun d'ina casa a **Selva** entras ina lavina. **Selva**. Documentau egl Archiv da cumin nr. 1049. Mira: Clom d'agid entras il cumin dalla **Cadi**, pag. 543, che ha purtau 225.40 frs.

### 1853

Barschau giu a **Sedrun** in clavau. Dau en donn al cumin. Archiv da cumin nr. 1051.

### 1853

Quei medem onn, ils 9 d'october, ei Balzer Antoni Curschellas da **Surrein** sedisgraziaus sper la punt da **Cavorgia/Val da Claus**.

### 1853

Ils 30 da november ei Sep Antoni Giossi da **Surrein** sedisgraziaus dadens **Nacla**, selischnond dalla glatscha giu entochen en via encunter ina buora.

### 1854

Quei onn, ils 22 da zercladur, ei Tumaisch Giusep Schmed da **Rueras**, in buobet da siat onns, daus en in vadretg enasi la **Vallatscha (Val Mila)** per vigelgia sogn Gions, ed ei morts e tratgs ora dadens ils praus da **Mila**.

### 1859

Ils 6 da december ei Vigeli Venzin da **Selva**, returnond da **Segnas**, daus per tiara vi amiez il vitg da **Sedrun** ed en paucs muments staus morts.

### 1863

**Val dil Plaun**, ils 11 da schaner. Ina lavina destruescha dus clavaus a **Selva**.

### 1863

Ils 20 da zercladur ha il buobet da 9 onns, Caspar Muggli da **Rueras**, catschond duas vaccas sur la punt da **Rueras** vi, survegniu dad ina da quellas in stausch ch'el ei daus ell'aua. Pér sut **Sedrun** giu eis ei reussiu da trer igl affon miert ord il **Rein**.

## 1865

Ils 4 da fevrer ei il giuven Flurin Venzin da **Selva** vegnius ella lavina visavi **Selva** els **Banaus**, mond alla catscha sin cots selvadis.

## 1866

La davosa fiera da **Ligiaun** ei ida buca mal, aschia era la fiera d'**Altdorf** dils 19 da november. In marcadont da **Medel** che ha frequentau quella, ha stuiu schar ventscher sill'**Alpsu** duas vaccas ella lavina, duas ha el pudiu liberar, mo stuiu schar ventscher ellas la notg sil cuolm. El sez e siu cumpogn da viadi ein dalla lavina vegni fiers vi el lag, mo ein mitschai cun la tema e cun schar anavos ella neiv caput e capetsch.

*Gasetta Romontscha, nr. 49, 5-12-1866*

## 1868

Aua gronda. Donns da praus sut **Rueras**. Sbuaus a **Sedrun**. Donn da 8665 frs. (1- 4 d'october)

## 1869

In paster da **Tujetsch** ha anflau sur il **Lag da Tuma** sper il **Badus** l'ossa d'in carstgaun, carteivel d'in mistergner che veva avon entgins onns falliu la via sur l'**Alpsu**.

## 1870

Ella cufla dils davos dis d'october havess in Cavegn da **Breil** gleiti anflau la mort sill'**Alpsu**. Venderdis vargau ha el bandunau **Ursera** pér allas duas suentermiezd. Vagnend sisum il lag, er'e stgir ed el veseva buca pli ils parricars sco fastitgs dalla via. Per buca rescarr dad ira surengiu ella stgiraglia, seresolva el da restar grad eri. El batta in toc buna via e va cheu a spass en tutta aura dallas sis dalla sera entochen las sis dalla damaun. Lura anfla el il stradun e va in toc vinavon. Nunpudend rumper via po el susentar umens da **Tschamut**, che vegnevan encunter ad el. Ella Rheinquelle a **Tschamut** pren el sin sia aventura in bien solver e dorma lu 24 uras e sededesta viscals e da bunaveglia.

*Gasetta Romontscha 1870, nr. 44*

## 1871

Dacuort vegnan dus Englès giu dil **Badus** el Hotel Rheinquelle a **Tschamut** e spetgan leu sin lur tierz cumpogn, che fuva restaus empau anavos sul **Lag da Tuma** si. Ei vegn notg ed igl Englès selai aunc buca ver. Ses camerats plein tema, ch'el hagi falliu la via, ni ch'e seigi schabiau zatgei, tarmettan umens cun latiarnas e proviant sil **Cuolm** per encuirir el. L'entira notg traverseschan quels plirs cuolms e **Vals**,

greschan e schulan, mo anflan negin fastitg dil sepiars. Allas treis arrivan els anavos a **Tschamut** e declaran, che sch'el sesanfli aunc sil cuolm, seigi el buca pli en veta, tschelluisa havessien ei cun dar sinzur stuiu anflar el. En mesa desperaziun van allura ils dus Englès culs dus umens sin nova tscherca, ferton ch'e vegneva a **Sedrun** patertgau vid il cavar fossa per il disgraziau. La nova expediziun ei buca stada s'avanzada ton lunsch, ch'ella entaupa igl Englès



cartius morts. Quel di, ch'el vevi falliu la via e nunsavend nua semanar el stgir, seigi el sefiers sin ina meidia fein a pastg e durmiu stagn e bein tochen per la damaun vi. En triumf meinan ei el el hotel, nua ch'el ha dustau siu appetit englès cun in brav solver "alla savetscha" e pagau generusamein ils umens, che vevan encuretg el. Ina tala aventura vala bia marenghins els egl's d'in Englès.

## 1872

Ils 12 da settember ei Giachen Fidel Maria Cavegn vegnius tuccaus d'"in crap ruclont" en **Val Giuv** cun cavar cristallas ed ei vegnius bess en ina fessa d'in glatscher, nua ch'ins ha anflau el schelaus e stagn morts.

Remarca: Giachen Fidel Maria Cavegn ha anflau igl onn 1868 en **Val Giuv** igl emprem Milarit insumma. Per schar intercurir e numnar il nievanflau mineral entras in institut a **Berna**, ha el fatg, carteivel sappientivamein, ina fallida indicaziun dil liug d'anflada e numnau quel en **Val Mila**. Aschia survegn il mineral il bi num Milarit.

## 1876

Ils 10 da schaner ein statalter Stiafen Schmed, in bab da nov affons, ed il giuven Gion Fidel Peder da 18 onns, omisdus da **Tschamut**, vegni ella lavina, fagend via ellas **Vals (da Curnera)** per vegnir ora cun fein a pastg. Dus auters giuvens, in da sedisch e l'auter da schotg, han ins aunc pudiu cavar ora vivs.

*Gasetta Romontscha 1876, nr. 2*

## 1880

Entuorn ils 9 d'october ei Gion Antoni Deragisch da **Sedrun** morts o **Bigliel** da far si magliacs. En sia memoria pendeva ina crusch vid il clavau sper il stradun a **Bigliel Sura**.

## 1888

Ils 14 da fevrer, per Mardis-tscheiver, ein ils dus giuvens frars, Barclamiu e Vigeli Giusep Peder da **Selva**, mond per ina vaulta draussa, vegni ella lavina gia beinmarvegl en **Plaun Viradas**, nua ch'els ein vegni bess sur in grep giu el **Rein**. Barclamiu veva 15 onns e siu frar Vigeli Giusep 17 onns. In han ins anflau pér la primavera en ina buola sut **Selva**. Els fuvan fegls da statalter Gion Antoni Peder da **Selva**.

*Gasetta Romontscha 1888*

## 1888

Il cavrer Giachen Antoni Curschellas da **Surrein**, in giuven da circa 17 onns, ei sin ina plauanca semess giu per durmir, la capiala sut il tgau ed il fest enta maun, mo ei buca levaus si pli. Veggend las cauras la sera persulas a casa, han ils vischins sminau ina sventira, ein spert i alla tscherca da lur cavrer, ed anflau quel morts ella posiziun descretta. Cumpatg ch'ei era vegniu giu in crap, che ha sturniu el." En sia memoria steva ina crusch vid il **Sontget** dils mats dil maundadora.

*Gasetta Romontscha 1888 nr. 25 (21-06).*

## 1890

Gion Antoni Jacomet da **Sedrun**, in affon da dus onns, ei daus ell'aua sper il fallun da **Salins** e vegnius tratg ora morts.

## 1892

Ils 4 da fevrer ein ils dus giuvens frars Paul Giusep e Vigeli Giusep Valier da **Camischolas**, fegls da marcadont Battesta Valier, vegni ella lavina en las **Ruinas da Pardatsch** cun ir per lenna e restai morts.

*(Gasetta Romontscha 1892)*

## 1892

Ils 7 da fevrer, gronda lavina a **Caspausa - Milez - Rivas**. Grond donn vid praus ed uaul.

**1896**

Il zerladur ei Gion Antoni Gieriet da **Sedrun/Gonda**, in buob da pressapauc otg onns, daus en in vadretg sil **Crest Liung** en **Val Mila**. Ins ha anflau el l'auter di morts sur la **Punt Miez**.

**1896**

Il fenadur ei il cavrer Sep Martin Lutz da **Soliva/Medel** ruclaus ella **Val Strem**, el **Pastuir digl Albin**, encunter **Cuolm da Vi** e morts en paucs dis en consequenza dallas blessuras.

**1896**

Quei medem onn ei Margreta Monn da **Rueras** morta orasi **Sur Giassa** ina dumengia da stad, mond a **Sedrun** a messa. Ina crusch steva leu en **memoria**.



**Londadusa (Ondadusa)**, la val denter **Uaul Flurin** e dretg **Uaul Camischolas**. Igl **Uaul Flurin** muossa cheu bravas largias.

Sut igl **Uaul Flurin**, encunter dretg, ei ina anteriura bova bein veseivla gest sur **Flurin Sura**. Ha quella bova a sias uras destruiu la caplutta da **Flurin Sura** che vegn menziunada el document da 1368? La disgrazia po esser schabegiada el decuors dil 15avel tschentaner.